



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

LAWATAN KERJA MENTERI PERDAGANGAN DALAM NEGERI DAN KOS SARA HIDUP KE SARAWAK

KUCHING, 9 FEBRUARI 2024 – Dalam lawatan kerja sehari ke Sarawak pada hari ini, saya telah menghadiri tiga program seperti berikut:

1. Program Jualan Rahmah

Program Jualan RAHMAH (PJR) merupakan program anjuran Kementerian Perdagangan Dalam Negeri dan Kos Sara Hidup (KPDN) yang menawarkan penjimatan harga barangan keperluan harian di antara 10 hingga 30 peratus lebih murah daripada harga biasa pasaran tempatan. PJR dilaksanakan dengan 3 pendekatan iaitu di dalam premis, luar premis (terbuka) dan secara bergerak.

Sepanjang tahun 2023, sebanyak **727 PJR** telah dilaksanakan di Sarawak meliputi 31 kawasan Parlimen yang telah menarik seramai **807,254 pengunjung**.

Bagi tahun 2024, **KPDN menyasarkan lebih banyak program dianjurkan sehingga ke peringkat Dewan Undangan Negeri (DUN)**. Sebagai penambahbaikan kepada program ini, bermula sejak Januari 2024, orang ramai boleh mengakses portal KPDN di <https://www.kpdn.gov.my/ms/jualan-rahmah/> bagi mendapatkan jadual penganjuran PJR di kawasan setempat. Pendekatan ini dibuat untuk memastikan orang ramai boleh mendapat maklumat lebih awal tentang tarikh dan lokasi penganjuran yang akan berlangsung di kawasan Parlimen dan DUN masing-masing.

2. Perjumpaan Bersama Menteri Utiliti dan Telekomunikasi Sarawak

Dalam pertemuan bersama YB Dato Sri Haji Julaihi Bin Haji Narawi, Menteri Utiliti dan Telekomunikasi Sarawak, antara perkara utama yang telah dibincangkan adalah berhubung aktiviti pengedaran gas yang meliputi gas asli dan gas petroleum cecair (LPG).

Kerajaan Sarawak telah mempunyai kawal selia penuh ke atas aktiviti pengedaran gas di negeri ini. Perundangan negeri iaitu Ordinan Pengedaran Gas 2016 (DGO 2016) telah dikuatkuasakan pada 1 Jun 2021 melalui Pemberitahuan Pengecualian di bawah Petroleum Development Act 1974 dan Perintah Kawalan Bekalan (Pengecualian) 2021.

Bermula 1 Jun 2021, peranan KPDN berhubung kawal seliaan, pengedaran dan pelesenan LPG telah diserahkan sepenuhnya kepada Kementerian Utiliti dan Telekomunikasi (MUT) Sarawak. Pada pertemuan hari ini, saya telah menzahirkan komitmen KPDN untuk memberikan kerjasama daripada aspek latihan dan advokasi dalam proses MUT meningkatkan kapasiti dan

mekanisme penguatkuasaan khususnya dalam menangani isu ketirisan subsidi melibatkan gas asli. KPDN juga bersedia untuk terlibat dalam sebarang operasi bersepadu penguatkuasaan sekiranya diperlukan oleh MUT.

3. Pertemuan Bersama Pesuruhjaya Polis Sarawak

Dalam pertemuan bersama YDH Dato Mancha Ata, Pesuruhjaya Polis Sarawak, perbincangan adalah tertumpu kepada strategi meningkatkan kerjasama berterusan KPDN dan PDRM Sarawak. Antara fokus utama adalah berhubung penguatkuasaan membanteras ketirisan minyak diesel bersubsidi melalui *Task Force* yang telah ditubuhkan bagi Ops Tiris.

Berdasarkan statistik penguatkuasaan seluruh negara di bawah Ops Tiris pada tahun 2023, sebanyak 15,927 pemeriksaan telah dijalankan dan telah melibatkan 877 kes termasuk 386 kes serahan agensi. Ini melibatkan kuantiti rampasan sebanyak 6,441,118 liter minyak diesel dengan anggaran keseluruhan nilai berjumlah RM14,208,824.

Manakala untuk Negeri Sarawak, sepanjang pelaksanaan Ops Tiris pada tahun 2023, 168 kes telah direkodkan dengan nilai rampasan berjumlah RM6,554,327. Serahan kes melibatkan minyak diesel bersubsidi meliputi PDRM sebanyak 17 kes, Pasukan Polis Marin sebanyak 74 Kes dan Pasukan Gerak Am sebanyak 13 kes. Data ini menunjukkan bahawa hampir 62 peratus daripada kes yang direkod adalah melalui serahan kes pihak polis.

Pada tahun 2024, skop Ops Tiris terus diperkukuhkan bukan sahaja meliputi minyak diesel bersubsidi malah diperluaskan kepada barang kawal lain seperti

petrol RON 95, minyak masak polibeg 1 kilogram bersubsidi, LPG dan gula pasir putih bertapis.

Penyasaran semula subsidi khususnya minyak diesel akan dilaksanakan oleh Kerajaan pada tahun ini seperti yang telah diumumkan oleh YAB Perdana Menteri dalam Belanjawan 2024 bagi Semenanjung Malaysia kecuali bagi Sabah dan Sarawak. Oleh yang demikian, bagi memastikan minyak diesel bersubsidi di Sabah dan Sarawak sampai kepada golongan sasar, KPDN bersama-sama PDRM dan agensi-agensi penguatkuasaan lain terus komited membanteras ketirisan barang-barang kawalan yang bersubsidi secara *whole of government approach*.

YB DATUK ARMIZAN MOHD ALI
Menteri Perdagangan Dalam Negeri
dan Kos Sara Hidup

###